



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 11. 2018

E Bolsa di Balor no ta un banko; e ta un merkado.

“Invertimentu mester ta mas manera wak fèrf seka òf wak yerba krese. Si bo ke eksitashon, tuma \$ 800 i bai Las Vegas.”

Paul Samuelson

Un intermediario finansiero?! Por ta bo a tende di esei kaba, pero bo sa kiko e ta nifiká en bèrdat? Por ta bo tin un idea pero e ora ei por ta bo mester di un poko klaridat tokante kua intermediario finansiero ta hasi kiko? Lo mi trata di splik’é na plaka chikí pa bo.

Pensa di un intermediario finansiero komo un persona intermedio den un transakshon di negoshi. Nos sa ku un persona intermedio ta un hende ku ta areglá un dil entre dos sèt di hende. Pues, den otro palabra, e persona intermedio – i asina e intermediario finansiero - ta aktua komo un link entre hende pa asina yega na un akuerdo òf un dil di negoshi.

Tin hopi tipo di “persona intermedio” den e industria finansiero. Por ehèmpel, un banko komersial. E banko ta e persona intermedio normalmente mihó konosí den e industria finansiero. Esaki ta pasobra e banko ta reglá e sèn di esnan ku tin, un prestamista – via nan sènnan di spar – i ta duna esei na hendenan ku no tin, tumadónan di fianza – via fiansanan i hipoteknan. Al final, e banko ta aktua komo un di e último intermediarionan den e merkado finansiero.

Tin un otro intermediario finansiero krusial ku ta hunga un ròl signifkante den e industria finansiero: E Bolsa di Balor. E Dutch Caribbean Securities Exchange òf DCSX ta aktua komo e persona intermedio entre kompanianan – ku mester di finansiamentu, sea ku ta un kompania prinsipiante a punto di ekspanshon òf un kompania madurá ku ke eksplorá oportunidatnan nobo – i e invershonistanan ku tin sènnan i ke invertí den e kompanianan prinsipiante òf kompanianan madurá aki. E Bolsa di Balor ta aktua komo e merkado último pa konektá e kompanianan i invershonistanan aki. Pues e DCSX, ku asistensia di konseheronan di kotisashon i brokernan

registrá, ta sigurá ku e kompania ku emití un bono òf akshon pa rekoudá kapital ta wòrdu konektá ku invershonistanan ku ke kumpra e bononan òf akshonnan. E Bolsa, pues **no ta duna fiansa ni ta tuma depósitonan òf ofresé kuantanan di spar**. E bolsa ta aktua solamente komo un merkado, un lokalidat elektróniko pa partidonan interesá interkambiá propiedat di akshonnan i bononan pa sèn.

Aunke ta eksistí semehansanan, mi ke enfatisá e diferensianan prinsipal entre e dos intermediarionan finansiero prinsipal:

1. E diferencia mas grandi ta ku un banko por duna finansiamentu na un persona òf kompania. Un individuo por haña un fiansa personal, por ehèmpel, pa kumpra un outo òf un kas. E mesun persona ei por presentá dokumentonan pa su kompania i ta kapas pa haña un fiansa pa e kompania pa kumpra ekipo òf pa invertí den un proyekto. Di otro banda, e DCSX por solamente fasilitá e finansiamentu di kompanianan i no ta pèmití finansiamentu pa metanan personal.
2. E karakteristiká normalmente mas mal kompréndé di e DCSX ta ku e Bolsa ta kapas pa duna fiansanan òf sèn na un kompania. Esaki no ta korekto. E DCSX ta solamente krea e merkado pa e kompania hasi un oferta na e públiko i pa e públiko tin un oportunidat pa akseptá e oferta i hasi un invershon òf rechasá e oferta i wak otro opshonnan di invershon.
3. Pa haña un fiansa serka un banko bo ta presentá e relatonan finansiero di bo kompania huntu ku otro informashonnan di e kompania i e ofisial di krédito di e banko ta evaluá i chèk si nan lo otorgá bo un fiansa. Kontrali ku DCSX, e kompania, ku e asistensia di su konsehero di kotisashon, ta splika e prestashon di e kompania i e motibu pa rekoudá e sèn via un otro proseso. E informashon ta wòrdu poné huntu den un dokumento yamá e Offering Memorandum, ku ta wòrdu kompartí ku e públiko e ora ei. E públiko e ora ei ta evaluá i disidí si nan lo invertí i fia sèn na e kompania. Pues, kaminda e banko ta esun ku ta disidí si ta duna un fiansa òf nò i ta realmente hasi e pago di e fiansa na e kompania, e DCSX no ta duna niun opinion tokante e oferta di e kompania i ta e invershonistanan ta esnan ku ta tuma e desishon si ta invertí nan sèn òf nò.
4. Pa un kompania riba e DCSX ku mester di finansiamentu, normalmente mester di ménos garantianan pa haña finansiamentu, kaminda ku e banko, un kompania normalmente ta wòrdu puntrá pa duna garantianan supstansial. Lokalmente e bankonan ta puntra spesífikamente pa garantianan den real estate. Riba e Bolsa, invershonistanan potensial ta mas inkliná pa evaluá e potensial di kresementu i e abilidadat pa hasi ganashinan di e kompania, den lugá di evaluá e kantidat di garantianan ku e kompania por duna.
5. E kosto di haña finansiamentu por ta mas barata ora e wòrdu hasí via e Bolsa kompará ku haña un fiansa via un banko. Lokalmente, e tasa di interes ta mas abou pa un bono ku e tasa di interes ku mester paga riba un fiansa di un banko komersial.

Pa kompanianan mas grandi ku ta buska finansiamentu di proyektonan hopi grandi, e por resultá finansieramente prudente, pa buska finansiamentu no solamente via fiansa di banko pero tambe via e emishon di bono/akshon pa oumentá e kapital ku wòrdu rekoudá i pa minimalisá e kosto di finansiamentu.

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki a wòrdu presentá na bo pa DCSX ku kolaborashon di Vertex Investments.

Outor di e publikashon aki: Stephanie Shaw CFA, MBA.

